

WACHUNGAJI WAZAWA NCHINI TANZANIA

Re-arranged and translated by Pastor Stephen Letta

Whitson Mwakilembe Mwamakamba (1947–2005)

Maisha ya Awali, Elimu, na Ndoa

Whitson Mwamakamba alikuwa mhamasishaji mahiri wa uinjilisti wa vitabu na msimamizi hodari katika kazi ya uchapishaji. Whitson Mwakilembe Mwamakamba alizaliwa katika familia ya Nnyali Mwasengo na Veronica Kionyela tarehe 24 Aprili, 1947, katika kijiji cha Masoko, wilaya ya Tukuyu, mkoani Mbeya, Tanzania. Wazazi wake walikuwa wakulima ambao walimfundisha kazi za mikono, ambazo alizifurahia pamoja na ndugu zake katika kijiji chao. Mwamakamba alijiunga na Shule ya Msingi ya Kiadventista ya Masoko na baadaye kwenye Shule ya Kati ya Masukulu ambako alimaliza darasa la nane. Hakuweza kuhudhuria shule ya sekondari mara moja kwa sababu ya rasilimali chache na uhaba wa shule katika mkoa huo. Badala yake, alianza kuuza vitabu. Akiwa anaendelea na kazi, hatimaye alifanikiwa kuhudhuria shule ya sekondari, na kuhitimu masomo ya chuo kikuu. Mnamo 1982, Mwamakamba alianza kusoma katika Chuo cha Kumbukumbu ya Spicer, na kupata digrii ya BA katika teolojia na huku akichukua kozi ndogo ya afya ya umma. Baadaye akaendelea na Chuo cha Union ya Ufilipino ambako alipata digrii mbili za Uzamili katika dini na afya ya umma mtawalia. Elimu ya darasani ya Mwamakamba ilifikia kilele cha Ph.D. katika utawala wa umma. Mwamakamba alifunga ndoa na Judith Mbibi Mwamakamba mwaka 1971. Walizaa watoto watano, Lutufyo, Lusekelo, Lusubilo, Lufingo, na Lwijisyo, ambao wote ni waumini waaminifu na wengine wanahudumu kanisani.

Uchungaji

Baada ya kumaliza elimu yake ya darasa la nane, Mwamakamba alibahatika kupata ajira katika Kampuni ya Iringa Diamond Cutting Company mwaka 1968. Hata hivyo, alipokataliwa kupumzika siku za Sabato, aliacha kazi hiyo. Mnamo mwaka wa 1970, aliitwa kujiunga na huduma ya uinjilisti wa vitabu katika Mji wa Iringa ambako alifanya kazi kwa bidii sana na kufuzu kama mwinjilisti wa vitabu aliyethibitishwa mwaka huo huo. Kutokana na mafanikio yake ya kuuza vitabu, Mwamakamba alipandishwa cheo na kuwa mkurugenzi msaidizi wa uchapishaji katika Mji wa Songea. Mwaka 1973, aliamishiwa Mbeya akiwa katika nafasi hiyo hiyo.

Mwaka 1975, Mwamakamba alihudhuria Seminari ya Waadventista Arusha ili kupata sifa za kufanya kazi ya uchungaji. Mwaka 1977 akawa mchungaji wa mtaa wa Iringa. Mwaka huo huo, aliitwa kuongoza idara ya uchapishaji ya Tanzania General Field. Alikuwa miongoni mwa kundi la wachungaji watano wakuu walioendesha mikutano ya injili kote Tanzania mwaka 1979. Kuanzia 1991 hadi 1992, alihudumu kama Chaplain, au mlezi wa kiroho wa vyuo vikuu na vyuo vya kati katika jiji la Dar es Salaam. Baada ya hapo, Kanisa lilimwita kuhudumu kama mkurugenzi wa Idara ya Uchapishaji ya Divisheni ya Afrika Mashariki yenye makao makuu Harare, Zimbabwe. Mwaka 1995, Mwamakamba alikuwa mjumbe wa kikao cha Mkutano Mkuu wa Utrecht, Uholanzi. Aliendelea kuhudumu kama mkurugenzi wa uchapishaji katika Divisheni mpya ya

WACHUNGAJI WAZAWA NCHINI TANZANIA

Re-arranged and translated by Pastor Stephen Letta

Afrika Mashariki-Kati yenye makao makuu Nairobi, Kenya, baada ya kupangwa upya kwa bara la Afrika katika divisheni tatu mwaka 2003. Alihudumu katika nafasi hii hadi alipofariki Desemba 19, 2005.